

DOMINGU II KUAREZMA – TINAN C

Tema

Leitura sira domingu ne'e nian konvida ita atu reflète ita-nia "transfigurasaun", ita-nia konversaun ba moris foun husi Maromak.

Leitura dahuluk apresenta mai ita Abraun, modelu fiar-na'in nian. Ho Abraun, ita simu konvite atu "fiar", katak, iha atitude ida konfiansa totál, aseitasaun radikál, saran an tomak ba Maromak nia planu sira ne'ebé nunca falla no nafatin fiél ba ninia promesa sira.

Leitura daruak konvida ita atu hakribi atitude foti-an nian, autosufisiénsia no trinfalizmu nian, mai husi kumpre ritu esternu sira; ita-nia transfigurasaun mak rezultadu husi konversaun fuan nian, harii iha sinál krús nia okos, katak, domin no saran an nian.

Evanjellu apresenta mai ita Jezús, Aman Maromak nia oan doben, ne'ebé liuhusi ninia krús konkretiza libertasaun. Maromak nia projetu libertadór liuhusi Jezús la hala'o hodi podér no triunfu, maibé hodi entrega moris no domin ne'ebé fó to'o mate. Ne'e mak dalan ne'ebé lori ita mós ba transfigurasaun iha Ema Foun.

LEITURA I – Gen 15,5-12.17-18

Leitura dahuluk halo parte "tradisaun patriarkál" (Gn 12-36). "Tradisaun" sira-ne'e kahur "mitu orijen" nian ho "aikanoik kultu nian", indikasaun maizumenus konkreta kona-ba klán nómada sira ne'ebé sirkula iha Palestina nia moris no reflesaun teolójika ikus atu apresenta ba israelita sira modelu moris no fiar nian.

Klán sira refere iha "tradisaun patriarkál" – Abraun, Isaac no Jacob – soi sira-nia mehi no esperansa sira. Denominadór komún iha mehi sira-ne'e mak esperansa atu hetan rai isin no ho bee, nune'e mós soi família forte no barak ne'ebé kontinua tribu nia memória no impoin inimigu sira. Sira-nia maromak mak konkretizadór ideál ne'e nian.

Iha "ambiente" ida-ne'e mak testu koloka ita. Iha Maromak nia oin, Abraun lamenta (kf. Gn 15,2-3) tanba nia moris atu to'o ona rohan no ninia erdeiru mak atan ida, Eliezer. Sá loos Maromak nia resposta ba Abraun?

MENSAJEN

Parte dahuluk testu nian hahú ho Maromak ne'ebé fó resposta ba Abraun no garante ba nia dexendénsia barak hanesan "fitun iha lalehan" (vers. 5). Abraun fiar iha Jahwéh, nune'e, Na'i konsidera nia ema justu. Fiar iha ne'e mak atitude ida konfiansa totál nian, aseitasaun radikál, entrega an tomak ba Maormak nia hanoin; justisa mak konseitu relasionál, ne'ebé esprime komportamentu loos ida kona-ba relasaun komunitária ida: iha ne'e signifika rekoñesimentu katak Abraun soi komportamentu korretu ida iha nia relasaun ho Jahwéh, bainhira aseita ninia planu sira laho laran-rua ka diskusaun.

Promesa mai hamutuk ho komplementu ida: garantia kona-ba rai ida (vers. 7). Tema rua – dexendénsia no posesu rai nian – la'o hamutuk iha kazu sira-ne'e.

Parte daruak testu nian apresenta Maromak ne'ebé halo preparativu ba kultu serimoniál misteriozu ida. Ne'e mak ritu konkluzaun aliansa ida-nian: fahe balada iha rua no tau sorin ida iha sorin seluk nia oin; sé mak halo aliansa sei liu husi balada nia klaran no hateten ba nia an rasik malisan ida, se karik nia hakotu aliansa ne'e.

Hodi tuir ema sira nia modu atu garante firmeza kontratuál, katekista bíbliku asentua ideia kompromisu solene ida no metin entre Maromak no Abraun. Halo nune'e Maromak nia promesa sai garantia totál.

Buat ida tan: Maromak la husu buat ida husi Abraun, nia la husu mós Abraun atu liu husi balada fahe rua nia klaran (Maromak de'it mak liu ho "ahi lakan"). Maromak nia promesa ba Abraun mak gratuita no inkondisionál.

LEITURA II – Filip 3,17-4,1

Iha dadur-fatin (iha Éfeso?), Paulo agradese Sarani Filipense sira-nia preokupasaun ba nia (to'o haruka osan no membru ida komunidadade nian atu tulun Paulo iha dadur laran), fó notísia, bolu sira ba fidelidade no fó hanoin ba sira atu kuidadu ho apóstolu falsu sira Evanjellu Jezús nian. Karik ita iha tinan 56/57.

Paulo dehan ba Filipense sira atu matan moris ho "asu sira" (kf. Flp 3,2). Sira mak ema sarani ho orijen judaika ne'ebé konsidera an nu'udar sira mesak mak perfeitu no kaer lialoos, no eziye sarani sira atu kumpre Lei Moisés nian, hodi kria konfuzaun ba komunidadade sarani iha mundu eléniku. Paulo nia liafuan toos tebes ba sira ne'ebé konfunde sarani sira no desvia husi esensiál fiar nian.

MENSAJEN

Filipense sira iha possibilidade rua no ezemplu barak atu tuir. Ida mak Paulo nian, ne'ebé konsidera nia an atleta loos ida ne'ebé hahú tiha ona ninia korrida, maibé konxiente katak nia seidauk to'o iha meta; ida fali mak pregadór sira husi relijiaun judaika ne'ebé gaba an katak sira ho forma kompleta no definitiva partisipa ona iha Kristu nia triunfu. Paulo rekuza triunfalizmu no la duvida atu husu ba Filipense sira atu keta banati tuir ezemplu husi pregadór loko-an sira ne'e, maibé Paulo rasik nia ezemplu. Ba Filipense sira no ba sarani hotu, Paulo aviza katak iha buat hotu sira keta konsidera an nu'udar manán ona vitória no simu glória, maibé nu'udar atleta sira ne'ebé sei halo kompetisaun, hodi hein atu to'o ba meta no vitória. Salvasaun ne'e sei iha prosesu jestasaun nian. Prosesu ida iha-ne'ebé sarani sira sai tasak ho modu progresivu iha Kristu nia krús nia okos.

Sira seluk, "ne'ebé sira-nia maromak mak kabun" (Paulo kritika sira-nia observánsia kona-ba hahán), ne'ebé tau sira-nia "orgullu iha sira-nia moe" (sirkunsizaun) no "kesi sira nia fuan ba sasán rai nian" (karik hahalok foer), haluha tiha buat ne'ebé esensiál no hetan kondensasaun ba perdisaun (vers. 19).

Ita-nia destinu definitivu, tuir Paulo, la'ós isin ne'ebé sai dodok no sei mate, maibé isin ida ne'ebé sei nakfilak liuhusi moris-hi'as. Nu'udar garantia ba ida-ne'e, ita iha Jezús Kristu, Na'i no Makso'ik.

EVANJELLU – Lc 9,28b-36

Ita iha finál "etapa Galileia nian"; durante etapa ne'e, Jezús hakaken salvasaun ba kiak sira, proklama libertasaun ba dadur sira, halo ema matan-delek sira haree fali, sira ne'ebé ema hanehan hetan libertasaun, no haklaken tempu grasa Na'i nian (kf. Lc 4,16-30). Iha grupu ida mak forma ona hale'u Jezús no simu ninia oferta salvasaun nian (eskolante sira). Nu'udar sasin ba Jezús nia liafuan no jestu libertadór Jezús nian, sira deskobre tiha ona katak Jezús mak Maromak nia Mesias (kf. Lc 9,18-20). Sira mós rona ona katak Jezús nia mesianizmu liu husi krús (kf. Lc 9,21-22) no katak nia eskolante sira tenke tuir dalan hanesan: domin no

saran an nian (kf. Lc 9,23-26); maibé, molok sa'e ba Jerusalém atu fó sasin kona-ba salvasaun ninia manifestasaun totál, sira simu Aman nia revelasaun iha ne'ebé, husi foho aas ida, atesta katak Jezús mak Oan doben liu.

Ba ema bíbliku, “foho” mak fatin lulik boot liu: ho ninia pozisaun iha rai no lalehan nia klaran, nia sai fatin ideál ba ema nia enkontru ho mundu divinu. Nune'e, iha foho, mak Maromak hatudu An ba ema no aprezena ninia projetu sira.

MENSAJEN

Relatu transfigurasaun Jezús nian, mak pájina teolójika ida; nia hato'o katekeze ida kona-ba Jezús, Maromak nia Oan doben liu, ne'ebé liuhusi krús konkretiza projetu ida moris nian. Epizódium ne'e nakonu ho referénsia ba Testamentu Tuan. “Foho” lori ita ba kontestu ida revelasaun nian (Maromak halo aliansa ida ho nia Povu iha “foho”); “mudansa” iha oin no hatais sai mutin nabilan fó hanoin kona-ba Moisés nia oin nabilan, bainhita tun husi Sinai (kf. Ex 34,29); “kalohan” hatudu Maromak nia prezensa ne'ebé lori nia Povu liuhusi rai-fuik (kf. Ex 40,35; Nm 9,18.22;10,34).

“Moisés no Elias” reprezenta Lei no Profeta sira (ne'ebé haklaken Jezús no halo ita komprende Jesús); aleinde ne'e, sira mak personajen ne'ebé, tuir katekeze judaika, tenke mosu iha “Na'i nia loron”, bainhira sei manifesta salvasaun definitiva (kf. Dt 18,15-18; Mal 3,22-23). Sira ko'alia ho Jezús kona-ba ninia “mate” (“exodon” – “partida”) ne'ebé sei realiza iha Jerusalém. Liafuan ne'ebé Lucas uza tau ita iha kontestu “êxodo” nian: ba Lucas, Jezús nia mate ne'ebé besik daudaun, mak mate ne'ebé salva, hasai Maromak nia Povu husi rai atan nian ba rai liberdade nian.

Mensajen fundamentál mak ida-ne'e: Jezús mak Maromak nia Oan doben liu, no liuhusi nia Aman Maromak oferese ba ema sira proposta ida aliansa no libertasaun nian. Testamentu Tuan (Lei no Profeta sira) no figura sira Moisés no Elias nian indika/see liman ba Jezús no haktuir katak iha Nia mak salvasaun definitiva sei konkretiza. Libertasaun definitiva ne'e sei akontese iha krús, bainhira Jezús kumpre ho modu integrál ninia destinu saran-an nian, don nian, domin totál nian. Ida-ne'e mak “ézodu foun”/“novo êxodo”, loron libertasaun definitiva Maromak nia Povu nian.

No “matan-dukur” eskolante sira-nian no “taka-baluk” (tenda) sira? “Matan-dukur” simbóliku tebes: eskolante sira “toba” tanba sira lakohi komprende katak Mesias nia “glória” tenke liu husi krús no saran moris; harii “taka-baluk”/tenda (refere ba “festa tenda” nian, bainhira hanoin fali tempu ézodu nian bainhira Maromak nia povu hela iha taka-baluk okos, iha rai-fuik) karik signifika katak eskolante sira hakarak para de'it iha momentu revelasaun glória nian, festa nian, no sees husi destinu terus ne'ebé Jezús tenke hala'o.